



25/= Ksh



# Al-Hudaa [Uongofu]



Volume 23, Issue 3

25th Rajab 1433

15th JUNE, 2012

## AS-HAAB UL-A'RAAF

NA: ABDUL-HALIM IBN MUHAMMAD NASSAR AS-SALAFI

### WATAKAPOKUWA WATU WA "AL-A'RAAF" KABLA YA KUINGIA PEPONI

Watu wa "Mahali Paliponyanyuka" wametajwa katika Qur'an kwenye Surah iliyopewa jina lao. *Al-A'raaf*. Allaah (سبحانه وتعالى) amesema: "Na baina yao (hao watu wa Peponi na Motoni) kutakuwa na mahali pa watu wengine (watu ambao bado hawajasamehewa vijidhambi vyao vidogo ili wende Peponi). Na juu ya mahala hapo palipoinuka watakuwako watu hao watakaowafahamu wote (wa Peponi na Motoni) kwa alama zao; na watawaita watu wa Peponi (kuwaambia): 'Assalamu alaykum' (amani iwe juu yenu). Wao (wenye vijidhambi hivyo) bado hawajaingia humo (Peponi) lakini wanatumai. Na macho yao yanapogeuzwa kwenye watu wa Motoni, husema: "Mola wetu! Usituweke pamoja na watu madhalimu (hawa; tusamehe makosa yetu tuingie Peponi). Na hao wa mahali paliponyanyuka watawaita watu (wa Motoni) wanaowafahamu kwa alama zao, waseme: "Haukukusaidieni wingi wenu (huko) wala (vile) mlivyokuwa mkijivunia. (Wazidi kuwasimanga kwa kuwaambia), 'Jee hawa (waliotiwa Peponi) sio wale mliokuwa mkiwaapia kwamba Allaah hatawafikishia rehema? (Mnaona sasa; wameambiwa) 'Ingieni Peponi, hakuna khofu juu yenu, wala hamtahuzunika.'" Surah al-A'raaf 7:46-49] Katika aya zilizo hapo juu, Allaah anatupasha habari yakwamba kutakuwepo na kizuizi cha kutenganisha baina ya Pepo na Moto na akafahamisha vyema yakwamba kizuizi hicho kitakuwa ni Ukuta alioutaja katika Surah al-Hadeed katika matamshi Yake: "Siku watakaposema Wanafiki

wanaume na wanafiki wanawake kuwaambia walioamini: 'Tungojeeni ili tupate mwangaza katika nuru yenu.' Waambiwe (kwa stihzai): 'Rudini nyuma yenu mkatafute nuru yenu. Labda mumeisahau.' Utiwe baina yao ukuta wenye mlango; ndani yake mna rehema na nje kwa upande wake wa mbele kuna adhabu.'" [Surat al-Hadeed 57:13]

Kwahivyo, Pepo itakuwa ndani ya Ukuta na Moto utakuwa nje yake. Na ni ndio ukuta huo ambao Allaah (سبحانه وتعالى) alioukusudia kuwa ndio "Al-A'raaf." [Tizama katika *Tadhkirah Al-Arib* cha Ibn al-Jawzi 1/178; *Tafsir al-Manaar* 8/430 na *Adwaa' Al-Bayaan* 2/300] Ibn Abbaas (رضي الله عنهما) amesema: "Maana ya *Al-A'raaf* ni mahali palipoinuka juu". Na pia akasema: "Ni mlima ambao unaotumika kama ukuta wenye kuziba baina ya Pepo na Moto. Mlima wenyewe una kishungi (au kilele) kama cha Jogoo. [Tizama katika *Tafsir Mujaahid* 1/237; na *Tafsir At-Tabari* 12/449]

Kwa muangaza wa maelezo haya. *Al-A'raaf* si katika sehemu ya Peponi wala si katika sehemu ya Motoni. Bali ni ukuta uliojitokeza juu ya makaazi yote hayo mawili na mwenye kusimama juu yake atakuwa na uwezo wa kuwaona wakaazi wa Peponi na wakaazi wa Motoni. [Tizama katika *Tafsiri ya At-Tabari* 12/450]

### NI KINA NANI HAO AS-HAAB UL-A'RAAF?

Baadhi ya wanavyuoni wamesema: "Hao ni watu ambao mema yao na maovu yao yako sawa; wana mambo mema yenye kiasi cha kuwawezesha kuupeuka Moto, lakini na maovu yao ni mengi kiasi cha kutowaruhusu wao kuingia Peponi. Watu hao watabakia hapo kwenye mlima huo (au muinuko huo) mpaka Allaah atakapowatolea uamuzi kama Atakavyo Yeye na awaingize Peponi kwa Rehema zake. Hii ndiyo rai ya al-Hudhaifah Ibn al-

Yaman, Ibn Abbaas, Ibn Mas'ud (رضي الله عنهم) - na idadi ya wanavyuoni miongoni mwa watu wema waliokuja baada yao. [Tizama katika *Kitaab az-Zuhd* cha Hanad 1/151; *Tafsir at-Tabari* 12/452; *Tadhkirah al-Arib* 1/179; *Tafsir al-Qur'an al-Adheem* 3/414; na *al-Budur as-Safirah fil-Umur al-Aakhirah* Uk. 279].

Baadhi ya wanavyuoni wamesema yakwamba wao ni watu wema ambao ni wasomi na wanavyuoni; baadhi yao wamesema yakuwa ni Mitume na baadhi nyengine wamesema yakuwa ni *ma-Shuhadaa'*.

Baadhi nyengine wamesema yakuwa ni baadhi ya waumini wazuri waliomaliza kutekeleza katika shughuli zao, kisha wakajitolea wakati wao kuyaangalia matakwa ya wenzao. Baadhi nyengine wamesema kuwa ni watoto waliozaliwa kutokamana na uzinifu [Tizama katika *al-Budur as-Safirah fil-Umur al-Aakhirah* Uk. 298; na *Fat-hul Qadeer* 2/207].

Juu ya yote hayo, linaloashiriwa na aya ni kwamba wao watakuwa ni watu watakaokuwa miongoni mwa wakaazi wa Peponi ambao kuruhusiwa kwao kuingia Peponi kutacheleweshwa kutokana na sababu zitakazojiri [Tizama katika *Al-Jaami' li Ahkaam al-Qur'an* 4/7/212].

Rai ya idadi kubwa ya wanavyuoni ni kwamba, wao ni watu wenye kiwango kilicho sawa cha mambo mema na maovu; na ambao mema yao hayana uzito unaostahiki wao waingie Peponi,

### YALIYOMO

AS-HAAB UL-A'RAAF	1 - 2
SWALA YA MAITI	2 - 3
WAJUE MALAIKA [2]	3 - 4

(Endelea Kutoka Uk. 1)

na kiwango cha maovu yao si kibaya kinachowastahiki wao kuingia Motoni. Kwahivyo, matokeo yake ni kwamba, watasimamishwa juu ya huo muinuko (al-A'raaf) kwa muda apendao Allaah. Hii ni rai iliyo sawa, kutokana na hadeeth iliypokea na at-Tabari kutoka kwa 'Amr bin Jareer aliyepokea yakwamba Mtume (صلى الله عليه وسلم) aliulizwa kuwahuu watu wa al-A'raaf, nae akajibu: "Hao watakuwa ni watu wa mwisho watakaotolewa uamuzi katika waja wa Allaah (Siku Ya Kufufuliwa). Baada ya Allaah atakapomaliza kutoa uamuzi miongoni mwa waja wake, awaambie: "Nyinyi ni watu ambao mema yenu yamewaepusha na Moto, lakini mukawa ni wapungufu wa kuwafanya muingie Peponi. Mimi nitawaacha huru musingie Motoni; (haya; sasa) ingieni Peponi mutembea mutakavyo!" Rai hii vilevile imethibitishwa na du'aa' iliyotajwa kwenye aya; kwani inamfaidisha yule atakaakuwa katika hali ya mema yake na maovu yake yatakapokuwa na uzani ulio sawa, na kwahivyo akawachwa asubiri haliyakuwa hajijui mwisho wake. Allaah atawaweka watu wa kwenye muinuko kwenye hali hiyo ili wapate kuwajua wakaazi wa Peponi kwa alama zao. Watawajua kutokana na nyuso zao nzuri zing'arazo, zikiwa na miangaza ya upeo wa furaha. Watawajua wakaazi wa Motoni kwa nyuso zao mbovu zenye kusononeka, zionyeshazo huzuni ndani ya macho yao. Haya ni kulingana na Ibn Abbaas, Mujaahid na al-Hasan al-Basree.

Allaah (سبحانه وتعالى) ameeleza kuhusu alama za wakaazi wa Peponi na alama za wakaazi wa Motoni kwenye idadi ya aya katika Qur'an, nazo ni kama zifuatazo:

**"(Katika) siku ambayo nyuso (nyengine) zitakuwa nyeupe, na nyuso (nyengine) zitakuwa nyeusi."** [Aal-Imraan 3:106]  
**"Nyuso (nyengine) siku hiyo zitang'ara (kweli kweli). Zinamtazama Mola wao. Na nyuso (nyengine) siku hiyo zitakunjana. Zitajua yakuwa zitafikiwa na msiba uvunjao uti wa mgongo."** [Al-Qiyaamah 75:22-25]  
**"Siku hiyo nyuso nyengine zitanawiri. Zitacheka, zitachangamka. Na nyuso nyengine Siku hiyo zitakuwa na mavumbi juu yake. Giza Totoro (kubwa) litazifunika."** [Abasa 80:38-41]  
 Watu wa hapo kwenye muinuko watawatizama wakaazi wa Peponi na wakaazi wa Motoni. watakapowatizama wakaazi wa Peponi, watawaambia, 'Amani iwe juu yenu!' lakini watakapowaangalia watu wa Motoni, na kuwona jinsi watakavyokuwa wakiumbuka, watamuomba Allaah asiwahusishe miongoni mwa watenda maovu waliojidhulumu nafsi zao na kujitakia ghadhabu za Allaah na mateso ya udhalilifu. Twamuomba Allaah atusalimu salama. Katika aya Tukufu, Allaah anatupasha habari yakwamba watu wa kwenye muinuko watatamani kuingia Peponi; na Allaah atawatia matamaniwa hayo kwenye nyoyo zao kama matokeo ya fadhila atakazowatunukia juu yao. Kwenye aya hiyo hiyo, Allaah (سبحانه وتعالى) ametupasha habari yakwamba

watu wa kwenye muinuko, watawalingania baadhi ya watu miongoni mwa wakaazi wa Motoni waliokuwa wakiwajua walipokuwa nao ulimwenguni, na ambao waliokuwa ni viongozi, watawala wa mabavu, viongozi madhalimu. Watawaambia: **"Na hao wa mahali paliponyanyuka watawaita watu (wa Motoni) wanaowafahamu kwa alama zao, waseme: 'Haukukusaidieni wingi wenu (huko) wala (vile) mlivyokuwa mkijivunia."** [Al-A'raaf 7:48]  
 Mali zao walizokuwa wakizirundika na kuzieka kama akiba hapa ulimwenguni na jeuri zao na madharau mbele ya Haki na wana-adamu wenzao hayatowafalia chochote. Wakati huohuo, makafiri ambao watakaokuwa ndani ya Moto, wataapa yakwamba watu wa kwenye muinuko (Al-A'raaf) watajiunga nao (humo ndani ya Moto). Na hapo ndipo pale Allaah atakapowaambia kwa kuwakaripia: **"Je, hawa (waliotiwa Peponi) sio wale mliokuwa mkiwaapia kwamba Allaah hatawafikishia Rehema?"** [Al-A'raaf 7:49]. Matamshi haya ni ya kuwashutumua na kuwalaumu kutokana na kejeli zao walizokuwa wakizitamka dhidi ya Waislamu madhaifu ulimwenguni. Kisha Allaah (سبحانه وتعالى) atawaamrisha watu wa kwenye muinuko (Al-A'raaf) waingie Peponi, nao wataingia kwa Rehema Zake ziizoenea juu ya kila kitu. Allaah akasema: **"Sikilizeni! Vipenzi vya Allaah hawatakuwa na khofu (siku ya Kiyama) wala hawatahuzunika. Nao ni wale walioamini na wakawa wanamcha Allaah (wanafuata amri Zake na wanajiepusha na makatazo yake)."** [Yunus 10:62-63]

## SWALA YA MAITI

**WUDHOO':** Jee, anahitajika mtu kuwa na wudhoo' kwa ajili ya swala ya Janaazah?

**JAWABU:** Hakuna taarifa ya waziwazi katika Sunnah kuhusiana na suala hilo. Lakini hata hivyo, sisi tungelipendekeza kwa mkazo kabisa jambo hilo, kwa sababu hukmu ya ujumla ya swala kwa kawaida inahusu pia swala ya Janaazah, na kwa sababu ndani yake muna usomaji wa Qur'an, dhikr na du'aa', ambayo yanahitajika kusomwa na mtu akiwa katika twahara ki-ukamilifu.

### **KUSWALI KWA JAMAA'AH:**

Kama zilivyo swala tano za faradhi, ni waajib kuswaliwa swala ya Janaazah kwa Jamaa'ah. Hivyo ndivyo alivyokuwa

akifanya kwa kawaida Mtume (صلى الله عليه وسلم), na akawaamrisha Waislamu wafuate mfano wake kwenye swala aliposema: "Swalini kama mulivyoni mimi nikiswali." Lau kama watu wataswali kila mmoja peke yake, uwajibikaji utakuwa umetekelezwa, lakini watakuwa na madhambi ya kuwacha Jamaa'ah - Allaah ndiye Mjuzi zaidi. Imaam an-Nawawee (رحمه الله) amesema: "Hakuna ikhtilafu (miongoni mwa wanavyuoni) yakwamba inaruhusiwa kuswali Janaazah kila mmoja peke yake. Lakini Sunnah ni kuiswali kwa Jamaa'ah, kutokana na hadeeth iliyo swaheeh kuhusiana na suala hili, pakiwa na ziyada ya maafikiano ya wanavyuoni.

Mtu hwenda akashangaa na kujiuliza: "Basi mbona Maswahaba walimswalia Mtume (صلى الله عليه وسلم) kila mmoja kivyake bila ya kuwepo Imaam?" Imaam Ibn Hajar amesema kuhusiana na hayo: "Amesema Ibn Duhyah, 'Ukweli ni kwamba, Waislamu walimswalia kila mmoja peke yake bila ya kuwepo Imaam. Imaam Ash-Shaafi'i akathibitisha yakwamba hii ilikuwa ni kutokana na darajan Kubwa ya Mtume (صلى الله عليه وسلم) - Babangu na Mamangu wawe ni kikombozi chake na kwamba walisitiza yakwamba pasitokee mtu yoyote atakaeongoza swala ya kumswalia yeye'. Na Allaah yanamueleza zaidi.

(Endelea katika Uk. 3)

Hili lilikuwa ni tukio maalum ambalo kwa hakika ni gumu kulieleza na, kwahivyo, hatuwezi kuliachilia mbali kwa ajili ya tukio hilo, jambo ambalo alilolishikilia kulifanya Mtume (صلى الله عليه وسلم) kama kawaida yake alipokuwa akiishi. Hapana shaka yoyote yakwamba uongofu wa Mtume (صلى الله عليه وسلم) ndiwo unaotangulizwa kwa sababu ndio ulio wa sawa na kuthibitishwa kwa njia iliyo bora zaidi.

## **NI NANI ANAEPASWA KUONGOZA SWALA?**

## **[ENDELEA KATIKA MAKALA YAJAYO].**

### **MALAIKA NA MAKAFIRI**

Malaika wanawachukia makafiri kwa sababu ya kutomuamini Allaah, wao hufanya mambo mengi yenye kumuudhi Allaah. Vilevile, Malaika huchukia vitendo vibaya vinavyofanywa na bina – adamu, na mara nyengine huwalaani watu wenye kufanya vitendo vibaya. Lakini mara nyingi Malaika huwalaani, na kuwapiza na pia kuwaadhibu makafiri.

### **MALAIKA HUWALAANI MAKAFIRI**

Malaika wanawalaani makafiri kwa sababu ya kutomuamini kwao Allaah na pia hufanya vitendo vibaya. Amesema Allaah (سبحانه وتعالى): **“Kwa hakika, wale waliokufuru na wakafa kama makafiri, juu yao ni laana ya Allaah, Malaika na watu wote.”** [Al-Baqarah 2:161-162].

### **MALAIKA HUWAADHIBU MAKAFIRI**

Mara nyengine, Malaika huteremsha adhabu na hasira za Allaah kwa watu makafiri na wenye kufanya vitendo vibaya. Mfano wa hayaq ni Malaika aliyekuja kwa Mtume Ibraahim (عليه السلام), kisha akaelekea kwenda kuwaadhibu watu wa Mtume Lut (عليه السلام). Allaah aliwaadhibu kwa kuwafanya Malaika wawateremshie juu yao mawe yenye sumu kutoka kwenye Jahannam.

### **MAMBO MENGINE YANAYOFANYWA NA MALAIKA**

Kuna mambo mengine yanayofanywa na Malaika kama yalivyoashiriwa kulingana na Kitaab cha Allaah na Sunnah za Mtume Muhammad (صلى الله عليه وسلم).

### **MALAIKA HULETA UJUMBE KUTOKA KWA ALLAHAH**

Allaah (سبحانه وتعالى) aliwachagua Malaika kwa kazi kubwa iliyo tukufu sana ambayo ni kuuchukuwa amri na mafunzo kwa watu. Akasema Allaah (سبحانه وتعالى): **“Kila Sifa njema zinamstahiki Allaah, muumba Mbingu na Ardhi, Aliyewafanya Malaika kuwa ni wajumbe ...”** [Faatir 35:1]. Malaika hawangelikabidhiwa jukumu hili kubwa lau kama hawangelikuwa na sifa

nzuri zilizowafanya wao kuwa ni viumbe bora miongoni mwa viumbe vya Allaah.

### **MALAIKA HUANDIKA MAMBO YENYE KUFANYWA NA WATU**

Allaah (سبحانه وتعالى) amewateua Malaika wenye kukaa na sisi katika nyakati zote. Wao huandika kila yutafanyayo, yawapo ni mazuri au mabaya. Akasema Allaah (سبحانه وتعالى): **“Wao wanadhania yakwamba Sisi hatuyasikii mazungumzo yao wanayo nong’onezana? Ndio, kwa hakika! Na Malaika (wajumbe) wetu wako pamoja nao kuyaandika.”** [az-Zukhruf 43:80].

Malaika hawa ni watukufu mno, na wao hawasahau kuandika kitu chochote. Kila mmoja wetu katika haya maisha ya kilimwengu huwa na Malaika wawili: mmojawapo katika upande wake wa kulia huwa anaandika mambo yote mazuri ayafanyayo na ayasemayo, na mwengine katika upande wake wa kushoto huwa anaandika mambo yote mabaya ayafanyayo na ayasemayo. Allaah (سبحانه وتعالى) amesema kuwahusu hao: **“Kwa hakika, hao ni Malaika muliowakilishiwa ili wawatazame. Wao ni watukufu na wanayadhibiti matendo yenu. Wanayajua yote muyafanyayo.”** [al-Infitaar 82:10-12].

Vilevile Allaah (سبحانه وتعالى) akasema: **“XXXXXXXXXXXXXXXX”** [Qaaf 50:17-18]. Katika kuwaamini Malaika hawa inatusaidia sisi kuishi vizuri. Na kujiepusha na vitendo viovu ambavyo wangelituandikia sisi. Na pia jambo hilo linatuhimiza sisi kujaribu kufanya bidii katika kutenda mema ambayo wangelituandikia sisi kuyafanya.

### **MALAIKA TUNAOWAJUA**

Malaika aliye muhimu sana ni Jibreel (عليه السلام). Yeye (huyo Jibreel) anaheshimiwa na kutwi’iwa na Malaika wote. Allaah (سبحانه وتعالى) amesema: **“XXXXXXXXXXXX”** [at-Takweer 81:19-21]

### **MAJINA YA JIBREEL**

Kwa lugha ya ki-Ingereza, Jibreel anaitwa Gabriel. Jibreel ametajwa mahali kwingi katika Qur’an. Mara nyengine hutajwa kwa jina, na mara nyengine hutajwa kwa Sifa alizokuwa nazo.

Katika Qur’an, Jibreel (عليه السلام) ametajwa kwa jina la “ar-Ruh” yenye maana ya “Roho” au “Uhai”. Na sababu ya kupewa jina hilo ni kwamba Jibreel ndiye Malaika aliyechukuwa mafunzo kutoka kwa Allaah (سبحانه وتعالى) mpaka kwa Mitume. Mafunzo hayo ndiyo yenye kuzipa nyoyo za wana-adamu Roho na Uhai wa kuishi. Vilevile, Jibreel ndiye aliyechaguliwa kuupuliza uhai wa Mtume ‘Issa (عليه السلام) ndani ya mwili wa mamake, bibi Maryam. Alipuliza kwenye upenyu wa nguo yake. Pumzi hizo zilizopulizwa zikapenya kupitia kwenye mwili wake na akashika mimba ya ‘Issa (عليه السلام). Vilevile, Jibreel anaitwa “Ar-Ruh al-Ameen” yenye maana ya “Roho muaminifu”. Amesema Allaah (سبحانه وتعالى): **“XXXXXXXXXXXXXXXX”** [ash-Shu’araa’ 26:192-194]. Kwahivyo Allaah akampa Jibreel kazi iliyopokuwa ni muhimu sana: Akawa ni Mjumbe Wake kwa wajumbe wote wa ki-Binadamu. Vilevile, Jibreel anaitwa “Ruhul-Quddus” yenye maana ya “Roho ya Aliyetukuka.” “Aliyetukuka” au “Al-Quddus” hapa ni Allaah (سبحانه وتعالى). Na pia Allaah alimwita Jibreel kwa jina la “Ruhunaa” yenye maana ya Roho iliyo yetu au inayotoka Kwetu.

### **KUKUTANA KWAKE NA MTUME (صلى الله عليه وسلم)**

Mtume (صلى الله عليه وسلم) alimuona Jibreel kwa mara ya kwanza alipokuwa Makkah. Alikuwa amekaa peke yake kwenye mlango wa pango dogo katika upande wa Mlima alipomuona akiwa juu Mbinguni. Kisha akashuka mpaka akawa karibu nae. Allaah (سبحانه وتعالى) akasema: **“XXXXXXXXXXXX”** [an-Najm 53:8-9]

Abdullaah Bin Mas’ud akasema: **“Mtume (صلى الله عليه وسلم) alimuona Jibreel. Alikuwa na mbawa mia sita.”** [Swaheeh al-Bukhari] Allaah (سبحانه وتعالى) amesema: **“XXXXXXXXXXXX”** [an-Najm 53:18]. Ibn Mas’ud amesema kuhusiana na haya: **“Mtume (صلى الله عليه وسلم) aliona pazia ya rangi ya kijani iliyofunika upeo wa macho.”** ‘Aisha (رضي الله عنهما) amesema: **“Kwa hakika Mtume (صلى الله عليه وسلم)**

alimuona Jibreel katika umbile lake la asili: Mbawa zake zilifunika mawingu.”

## **MWENDANI KATIKA SAFARI YA ISRAA'**

### **NA MI'RAJ**

Jibreel alikuwa pamoja na Mtume (صلى الله عليه وسلم) katika safari yake ya usiku kutoka Makkah hadi Jerusalem. Safari hiyo iliitwa al-Israa'. Katika usiku huo-huo, alipaa juu pamoja na Mtume (صلى الله عليه وسلم) katika safari ya kuelekea Peponi. Safari hiyo iliitwa al-Mi'raaj.

Kisa cha al-Mi'raaj kilisimuliwa na Anas Bin Maalik (رضي الله عنه). Alisema yakwamba Mtume (صلى الله عليه وسلم) alisema:

“Nilipokuwa Makkah, paa la nyumba yangu lilifunguka na Jibreel akateremkia hapo. Akafungua kifua changu na akakisafisha kwa maji ya Zamzam. Akaleta chano (tray) cha dhahabu kilichojaa Hikma na Imani, akayamimina yote hayo yaliyokuwemo ndani ya kifua changu kisha akakifunga. Akanishika mkono na kupaa juu pamoja na mimi hadi kwenye Wingu wa Chini kabisa, Jibreel akamwambia Malaika aliyekuwa akishika zamu mlangoni, “Fungua mlango.” Yule mshika zamu akauliza, “Ni nani huyo?” Jibreel akamjibu, “Ni mimi Jibreel.” Akaulizwa Jibreel, “Uko pamoja na mtu yoyote?” Akamjibu, “Na'am, niko pamoja na Mtume (صلى الله عليه وسلم).” akaulizwa, “Kwani yeye amekaribishwa hapa?” Jibreel akajibu, “Ndio.” Basi mlango ukafunguliwa, na tukaingia kwenye Wingu wa chini.” Hadeeth hii inaendelea kutueleza kisa cha safari ya Mtume (صلى الله عليه وسلم) pamoja na Jibreel mpaka wakafika kwenye Wingu wa Juu zaidi. Kisha Jibreel akamuonyesha Jannah; “Nililetwa kwenye mto. Pambizoni mwa mto huo palikuwa na mahema yaliyotengenezwa na Lulu. Nikamuuliza Jibreel, Ni nini hizi?” akajibu, “Ni ndiyo Kawthar.”

## **KUMFUNDISHA MTUME (صلى الله عليه وسلم)**

### **QUR'AN.**

Jibreel (عليه السلام) alimletea Mtume (صلى الله عليه وسلم) Qur'an kutoka kwa Allaah (سبحانه) (عليه وسلم) (وتعالى). Akamfundisha Mtume (صلى الله عليه وسلم) kuisoma na kuifahamu. Faatimah (رضي الله عنها) amesema yakwamba babake, Mtume (صلى الله عليه وسلم), alimwambia:

“Jibreel hunitembelea mimi kila mwaka na huwa twaisoma Qur'an pamoja. Alinitembelea nipate kuisoma mara mbili mwaka huu. Mimi nafikiri yakwamba hii ni alama ya kuonyesha kuwa wakati wangu umefika.

Kwa kawaida, Jibreel humfunza Mtume (صلى الله عليه وسلم) kuisoma Qur'an katika mwezi wa Ramadhaan. Akasema Ibn 'Abbaas (رضي الله عنه)